

ЕГЕМЕН ЕЛДІҢ ӘРБІР АЗАМАТЫ РУХАНИ МҰРАЛАРҒА ЖАНАШЫР БОЛУЫ КЕРЕК



Елбасының «Болашаққа бағдар: рухани жаңғыру» атты мақаласында қазіргі заманға сай жаңғыру, оның ішінде рухани жаңғыру мәселесі жан-жақты көтерілген. Маңызды саяси-идеологиялық құжатта таяу жылдарға арналған жобалар мен ауқымды міндеттер қойылып, еліміз дамыған мемлекеттердің қатарына енуді мақсат тұтады.

Елбасымыз айтқандай, көз ілеспес шапшаңдықпен дамып, жедел өзгеріп отырған мына дүбірлі дүниеде таптаурын қағидалардан арылып, рухани жағынан серпілуіміз, жаңғыруымыз қажет. Бұл арада рухани жаңғырудың ең басты шарты – ұлттық кодымызды сақтау екенін әрдайым есте ұстап, әлемдік өзгерістерге сай жаңаша ойлау жүйесін қалыптастырғанымыз абзал. Ұлттық кодты сақтау дегеніміз – қазақи болмысымызды нығайтып, оны ұрпақтан-ұрпаққа мұра ету, саналы да сапалы ұрпақ өсіру. Біздің ежелден келе жатқан салт-дәстүрлерімізде, мәдениетімізде, барлық рухани құндылықтарымызда тәрбиелік мән бар. Осы орайда Елбасының тікелей бастамасымен қолға алынған «Мәдени мұра» бағдарламасы – еліміздің рухани-мәдени өміріндегі айтулы құбылыс бола білді. Бұл жоба арқылы әлемге танылып қана қоймай, ұлттық мұраларымызды сақтап қала алдық. Бағдарламаны қабылдағаннан кейін елімізде көптеген жұмыстар қолға алына бастады. Мәселен, 2004 жылы 51 тарихи және мәдени

ескерткіштің реставрациялық жұмысы аяқталып, 39 қалашық пен қорғанға археологиялық зерттеулер жүргізілді. 218 нысанды қамтыған Қазақстанның тарихи-мәдени және тарихи ескерткіштерінің мемлекеттік тізімі дайындалды. Ұлттық мәдениет үшін аса маңызды 30 сәулеттік және археологиялық қосымша ғылыми-зерттеу жұмыстары жүргізілді.

Отырар ауданында 2001-2004 жылдары ЮНЕСКО-ның шешімімен Жапония мен Қазақстан арасында «Ежелгі Отырар қала-жұртын консервациялау және сақтау» қорының халықаралық жобасы жұмысын бастағаны қуанарлық жағдай болды.

Қазіргі таңда мұражайда 258-ден астам тарихи-мәдени ескерткіш есепке алынған. Сондай-ақ, олардың аэрофото құжаттау жұмыстары іске асырылып, жаңа компьютерлік бағдарламаларды пайдалана отырып, өңірдің ежелгі ирригациялық жүйесі зерттелді. Еліміздегі мұражайлар мен ескерткіштер ұлттық мәдениетіміздің құнды жәдігерлері болып табылады. Қорыта айтқанда, егеменді елдің әрбір азаматы өткенінен сыр шертіп, ата-бабаларының құнды тарихи мұраларын сақтап, өскелең ұрпақтың санасына сіңіру керек. Бұл өз кезегінде әрбір азаматтың туған жерге деген жанашырлығы, мәдени мұраларға деген қамқорлығы болмақ.

Қ.ШОХАЕВ, «Отырар мемлекеттік археологиялық қорық-мұражайы» РМҚК тарихи-мәдени ескерткіштерді қорғау бөлімінің меңгерушісі.